



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 6

Yangia anidakangma :



TAPAK 7

'Raj Bhawan Chalo' sentong agidang Assam Congress president apu

Pakistan indang taoba tir aser ato kilonser temi sempet ayuba osang sangdong



VOL. XX NO. 151 (ADOK 151) DIMAPUR SANGTENNÜ (TUESDAY) METSÜREMI (MARCH) 14, 2023 ₹ 5.00

HC-i May tashi nung Nagaland-Manipur highway renemtsü tuyur

Kohima, March 13, 2023 (Agencies): Hombarnü Gauhati High Court Kohima bench-i taküm May ita tatemlen tashi nung Nagaland den Manipur sendaktepba National Highway-2 mapa renemtsü tetuyuba agütsüogo.

Hombarnü Justice Lanusungkum Jamir aser Justice Kakheto Sema na adenba bench-i Public Interest Litigation (Suo Moto) ka angadang contractor M/S Fortune Groups dang May 30, 2023 tashi nung mapa tembangtsü tetuyuba agütsü.

Iba mapang tsüingda mapa metembangra National Highways and Infrastructure Development Corporation Ltd (NHIDCL) dang contractors blacklist asütsü atema shidi ka yoktsü ta High Court-isa ashi.

Kohima (Nagaland) nungi Mao (Manipur) tashi 2-lane with paved shoulder lenmang tajungba yanglushitsü atema September 30, 2020 nü Fortune Groups nem mapa lezmüksü. Kilometre 26.249 lenmang yanglutsü atema Rs 315.63 crore lezmüksü ta NHIDCL-i ashi.

November 20, 2020 nungi

mapa tenzük aser contract nungbo April 22, 2022 nung tembangtsü zülua lir. Ajsüiaka, mapa meinyakba atema March 2, 2022 nü High Court-i iba indang ken o benok.

State ana sendaktepba Highway dang Trans Asian Highway ta ajar saka lenmang kanga mejungi lir ta High Court-isa ashi.

Iba ken o angadanga arudang authority engineer aser contractors-i okadak March 2023 tashi nung mapatong tembangtsü ta shia aru. Okadaki mapang apulokjaka mapa meinyakma lir.

Hombarnü okadaki contractors dang mapang peria agüjaka mapa menuba ya public mesüshiba lir ta ashi.

December 2022 nungi contractors nem bills magütsüba atema onük atema NHIDCL-i "Rs 23 crore agütsüogo aser taküm February ita contractors-i Rs 3.3 crore bill ka agütsüba tang jangatepdar" ta metetdaksü.

Iba mapatong atema Rs 167.23 crore agütsüogo ta NHIDCL website nunga shia lir. Iba ken o ya April 12, 2023 nü ano angadangtsü.

HSLC paper leak: Assam Opposition-i Education minister mapa nungi anentsü akhanger

Guwahati, March 13, 2023 (Agencies): Assam nung Class 10 Board exam indang Science question paper temai adokba sülen opposition-i sorkar anema noktaker aser state education Minister Ranoo Pegu mapa nungi anentsü takhangba agütsür.

Science question paper temai adokba metetba sülen Board of Secondary Education, Assam (SEBA)-i Deobar aonung tesü Hombar tatidang athiba osang metetdakja liasü.

Assam nung Class 10 Board

examination tenzükba sülen tanga subjects indang question paper temai adokba osangtem lir ajsüiaka Education minister Ranoo Pegu-ibo item osangji tiyazü ta ashir.

Assam Legislative Assembly indang Budget Session nung Hombarnü opposition party temi paper leak ken o atema BJP-i aniba sorkar aitsü.

Congress-i high court judge ka lenisüba kübok iba tatalokba jungjunga bushisüngdangtsü mepishi.

(Maneni tapak 2 nung...)

TENÜNGSANG AGÜTSÜR

Sojasor Wb. Metsübo Jamir, 2018 küm 27 Mokokchung Town Assembly Constituency nungi adoka küm pungu tashi Minister menden nung nübur tenzük arur, ano lanlia taküm 2023 14th Nagaland Legislative Assembly election nunga takok tulu nguteta tanaben Minister menden ajangzükteba asoshi Longsa Welfare Society Salangtem Ward, Mokokchung-i tenüngsang tetushi agütsür. Iba den ano 27 Mokokchung Town A/C sanger shirnokisa pa dak temlung lema yaria adoktsüogo, nenok ajak dang mamatetba tepela lemsateper.

Naga nunger madak ramoka yimsü asütsü asoshi Tsüngremi asen lenir nem arishi talang den anema aliba moajangma.

Sd/-

Longsa Welfare Society Salangtem Ward, Mkg

Office of the Ningsangzalar Telongjem Chungtia

H.Q. Chungtia, P.O. Mokokchung - 798601

AITSÜR

Dated 22-02-2023 aonung ozü Chungtia senso Wb. Imkongchiba Kichu, S/o Lt. Supongnungsang Kichu dak maketba yimya nung merenshia taküm samatsüba atema ozü Ningsangzalar Chungtia-i kukua aitsür.

Sd/-

Moamongla President

Sd/-

Tsuktinungla Secretary.

Centre-i state 5 nem Rs 1,816 crore agütsütsü Nagaland nem Rs 68.02 crore lezmüksür

New Delhi, March 13, 2023 (Agencies): Union Home Minister Amit Shah menden ser High-Level Committee kati state pungu nem alima lendongtem atema Rs 1,816 crore teyari agütsütsü mulungogo.

2022 küm Assam, Himachal Pradesh, Karnataka, Meghalaya aser Nagaland nung tziümsüing, anentsüh aser tziünglu kanga aruba ajanga lendong balala ajuruba atema Centre sorkari teyari agütsütsü.

Shah lenisüba kübok HLC-i National Disaster Response Fund (NDRF) kübok state pungu nem

'additional central assistance' agütsütsü mulunga agizük.

Iba ajanga Prime Minister Narendra Modi lenisüba kübok Centre sorkari state pungu nung alima lendong balala ajururtem yaritsü mulungtetba sayur, ta sorkar sangdong ka ajanga metetdaksü.

Assam nem Rs 520.466 crore, Himachal Pradesh nem Rs 239.31 crore aser Karnataka nem Rs 941.04 crore agütsütsü ta sangdong nungsa shia lir.

Maneni, Meghalaya nem Rs 47.326 crore aser Nagaland nem Rs 68.02 crore agütsütsü

mulungogo.

Centre-i State Disaster Response Fund (SDRF) nem senotsü agütsüba dak alia state pungu nem sen talila agütsüsemtsü.

2022-23 financial year nung Centre sorkari state 25 indang SDRF nem Rs 15,770.40 crore agüjka liasü. Ano, state pezü nem NDRF nungi Rs 502.744 crore agütsü.

Lendong atalokba state tem nungi Memorandum mangudang yongi Centre sorkari Inter-Ministerial Central Teams (IMCTs) yoka asadangdaksü.

Nagaland nung NHM indang Mid-Term review agiogo

Dimapur, March 13, 2023 (TYO): Nagaland atema National Health Mission (NHM) indang Mid-Term review March 10, 2023 nü New Delhi nung agiogo.

Iba senden ya Nirman Bhavan, Ministry of Health & Family Welfare, New Delhi nung agi aser mendenji Addl. Secretary & Mission Director NHM MoHFW Roli Singh, IAS liasü.

Nagaland tenüng nung Commissioner & Secretary, Department of Health & Family Welfare Y. Kikheto Sema, IAS-i anir teshimtet nübotem aden.

NHM mapa tenzükba ajanga Nagaland nung Health care delivery service tajungba kümogo. India nung Nagaland ya IMR aser MMR tajemtiba lir, tanurtem immunization coverage jenjang tajungba kümogo, TB indang elimination phase tenzükogo aser Malaria o Leprosy samatsü atema inyaker ta Kikheto Sema-i senden nung ashi.

"Tesüiba kümtem India

sorkari mulungba budget nung 50% dang agizükter aser iba ya State lezmükba mapang shitak nung manguba lir. Senotsü shitak manguba ajanga mapa inyakba nung tetsükdaksü ajuruba dang masü saka staff itasen mapang shitak nung magütsüteter" ta paisa ashi.

NHM kübok mapa inyaker nisung 2000 tema lir aser parnok asoshi kümshia Rs 70 crore shi nungdaker. Tesüiba kümtem senotsü anguba ajanga itasen dang peri aser iba ajanga maparen aika meinyaktet, ta Kikheto-isa metetdaksü.

MoHFW-i State Share menguaka tanungba installments agütsütsü atema bilemdangtsü mepishir. Nagaland ama state tila atema küm nung installments pezüben masü saka anaben nung dang agütsütsü mepishir, ta paisa ashi.

Nagaland ya Panchayati Raj Institution indang 73rd Amendment kübok madener anungji Health Sector ya Health

& Family Welfare Department ajanga dang repranger. Iba jagi FY 2021-22 nung Urban and Rural Health Components atema XV FC grants mamshitet. Iba onük ya State level Committee nung jembioigo aser Nodal Department H&FW ajanga dang senotsü amshi junger ta jembioigo, ta Kikheto-isa metetdaksü.

Addl. Secy & MD NHM Roli Singh, IAS-ia XV FC grants ji Nagaland H&FW Department ajanga amshitsüla kechiyong ibaji Health Sector atema lir ta ashi.

Laisa Nagaland ama state tilatem nem installments ana nung approved budget agütsütsü mulungba ashi.

State sorkari budget agütsüba Ministry-i agizük aser parnokisa Nagaland sorkar dang mapang shitak nung State Share agütsütsü ashi.

Iba senden nung Kikheto den Dr. Ritu Thurr MD NHM aser tanga ketdangsiurtem aden, ta Dy. Director & PRO, New Delhi-i sangdong ka nung ashi.

Meghalaya aser Nagaland CM temi Amit Shah den ajuruteper



Meghalaya Chief Minister Conrad Sangma (achiji) aser Nagaland Chief Minister Neiphiu Rio (abelen) nati Union Home Minister Amit Shah den ajuruteper angur.

New Delhi, March 13, 2023 (Agencies): Meghalaya Chief Minister Conrad Sangma aser Nagaland Chief Minister Neiphiu Rio nati March 13, 2023 nü Union Home Minister Amit Shah den ajuruteper.

Chief minister anaprongi teloktep sorkar len anir aser sorkar

anapronng nung BJP dena lir.

Amit Shah-i Conrad aser Neiphiu napronng nem tenüngsang agütsü aser PM Narendra Modi lenisüba kübok sorkar tasentem ajanga nübortem taginüba tongtsütsü imlar ta ashi.

Conrad-i kumsük tanaben atema Meghalaya Chief Minister

inyaktsü. Taküm election nung pai aniba National People's Party (NPP) ajanga menden 26 nung takok angu.

Meghalaya nung teloktep sorkar dang Meghalaya Democratic Alliance 2.0 ta ajatsü lemtetogo.

Külen, Neiphiu Rio-i tan agi kumsük pungububa atema Nagaland Chief Minister inyaker.

Rio ya Nagaland nung mapang talangtiba Chief Minister inyaksang kümogo aser pai taoba Chief Minister S C Jamir otsü ajatetogo.

S C Jamir-i 1980, 1982-86, 1989-90 aser 1993-2003 tashi kumsük anaben atongtepa Chief Minister inyaka liasü.

Tanü senden nung Chief minister anapronngi Amit Shah dang pelaba metetdaksü aser pei pei state nung nübortemi taginüba tongtsütsüsa inyaktsü nangzük.

Dimapur nung 'The Healing Season' art exhibition ayongzüka lir



Limatola Longkumer aser Heather Layton den ketdangsertem külemi tangokba noksa angur.

Dimapur, Metsüremi/March 13 (TYO): IMC Hall, Dimapur nung aliba Nagaland Art Center nung 'The Healing Season' nungja agütsür international art exhibition ka ayongzüka lir, kong Nagaland nungi Limatola Longkumer aser United States nungi Heather Layton nungur mapa tem sayur.

Iba exhibition nung noksa yanglua aliba aser sentsü tepa alibatem sayur aser parnoki lungjemer inyakba mapa tem sayur, kong parnoki hopta aika artworks tem melentepa inyakba, o mejembi noksa

amshia osang agitepba densema lir.

Heather Layton ya contemporary American artist lir, shibai mapang shia tetsürtem otsü, politics aser sobaliba balala tsüngta tesendaktep yangluba indang jembir.

Lai yangluba noksa tem alima dang sayua arur aser item rongnung Alaska nung International Museum of Contemporary Art, New York nung Museum of Contemporary Arts Long Island aser Gangneung, South Korea nung Haslla Art World

Museum densema lir.

Layton-i nüburttem dak rangloker mapa balala inyakba aser tesayuba tsütsü yimya balala amshiba mechi sempet zünger mezüngmai agizüka lir.

Limatola Longkumer ya visual artist ka lir, aser lai la sasa angazük aser lai yangluba noksa ajanga yimjak nung meshi ama bilemba onük tem lemsateper. Lai alima, ken, tetsür aser temeim nung rangloker noksa tem yanglur.

Iba center indang coordinator Ababe Ezung-i ashiba agi, iba exhibition ya Marcg 31, 2023 tashi anepdang 10:00 ako nungi nikongdang 5:00 ako tashi alitsü aser taruner ajak arua reprangtetsü.

Iba center nung yua aliba artworks aser tang tagidak exhibition nung sayuba artwork tem ya ayoktsüba lir aser iba center ya ajanga artist nem sapang agütsütsü nükjidong lir, ta Ezung-i ashi. Ezung kinungtsü Sentienla ya IMC aser Nagaland Art Center indang coordinator lir aser tenati iba center ya ketdang asür.

Tesendaktep nungi pila aliba tendak ka sülen nüburttem 'natural world' den aser kati ka den tanaben sendakteptsü ajungmesoa iba sentong ya ayongzüka.

Kohima nung March 21 nü urban local bodies senden amentsü

Kohima, Metsüremi/March 13 (TYO): Nagaland nung municipality asem - Association of Kohima Municipal Wards Panchayats (AKMWP), All Ward Union Mokochung Town (AWUMT) aser Dimapur Urban Council Chairmen Federation (DUCCF) den district balala nungi town council 36 ajungben shisadokden senden ka March 21, 2023 anüngdang 11:00 ako nungi tenzüka Hotel 2K

(Officer's Hill Colony, below SP Office) Kohima nung amentsü, ta sangdong ka ajanga ashi.

AKMWP publicity & press secretary Kopelo Krome-i sangdong ka nung ashiba agi, state sorkari Urban Local Body (ULB) Elections sangdongba dak sendakba nung iba senden ya ayongzüker.

Town Council shia nungi züngsem ka-ka bosa arua adentsü mepishir, ta sangdong ajangasa ashi.

Karbi Anglong nung sen crore 30 jenjang heroin apu

Guwahati, Metsüremi/March 13 (Agencies): Temesepba mozü shibelenba anema tanen makai raraba nung shilem ka ama Karbi Anglong Police temi Deobarnü Khatkhati area nung gari ka nungi sen crore 30 jenjang heroin tuozük seret pongu pua liasü.

Bokajan, John Das-i osangbener dang ashi.

Osang tejangja kar angazükba nung ajemdaker police temi SBI Khatkhati branch anasa highway nung 'naka' amenok aser anepdang 10:00 ako mena Dimapur nungi aruba Bolero (AS 09 J 4746) sentsü temesüng ka anendaktsü. Police temi iba gari anisang arishi küm 41 tain Mohammad Fujel Ahmed puogo, shiba Islam Nagar, Hojai district Assam nungi lir.

Iba gari ya Dimapur nungi Nagaon lenir aorba liasü.

Police temi ashuba agi, iba temesepba mozü ya sapon talem 390 nung miimshia aleper liasü.

"Gari temang temalen miimshia chamber ka yanglur yangji osetji bona liasü. Oset junga miimtsü asoshi iba secret chamber ya yin amshia rongteper liasü," ta SDPO

Asüngdangyaba mapang Dimapur nungi bener aruba oset ya Nagaon bypass anasa tesem ka nung yutsütsü liasü, ta Fujel-i nangzüker.

MMC Sanitation Workers atema medical camp ayongzüker



MMC Sanitation Workers atema March 13, 2023 nü MMC Conference Hall, Mokochung nung Free Medical Camp and Workshop on Sanitation & Hygiene sentong alidang Addl. Deputy Commissioner & Administrator, MMC, Chumlamo Humtsoe-i okila o jembiba noksa nung angur.

Dimapur, Metsüremi/March 13 (TYO): Mokochung Municipal Council (MMC) Sanitation Workers atema Free Medical Camp and Workshop on Sanitation & Hygiene sentong ka March 13, 2023 nü MMC Conference Hall, Mokochung nung MMC ajanga ayongzüka liasü.

tongtipang, kechiaser anema aliba ajanga parnoki mapa takok ngua inyaktsü, ta pai ashi.

Chumlamo-i Ayushman Card maliba sanitation worker tem dang tekeraba nung iba card atema apply asütsü ashi aser iba ya ajanga parnok aser kibong ajangzüksü, ta ashi.

Addl. Deputy Commissioner & Administrator, MMC, Chumlamo Humtsoe-i sentong okila jembidang sanitation worker temi jila müreka aser tebour junga ayutsü asoshi anibelem mesasai bendanga agütsür inyakba atema ajaki pelatsüla, ta ashi.

Paisa Medical Officers aser Staff temi iba sentong takok ngudakja shilem agiba asoshi pelaba lemsatepa liasü.

Iba sentong nung Dr. Francis Rai, MO AYUSH, Kubza AHCW ajanga "Sanitation & Hygiene" onük nung jembir, Sentyapang, FA ajanga melepzüng o jembir, kong Sakumongba Longchar, FA menden liasü.

Sanitation workers temang anema alitsü ya kanga

Kohima College nung 54 buba Cultural cum Literary Day mungogo

Dimapur, Metsüremi/March 13 (TYO): Kohima College, Kohima nung March 11, 2023 nü "Cultural Integrity" omen nung ajemdaker 54 buba Cultural cum Literary Day munga liasü, kong o jembir Dr. Theyiesinuo Keditsu, Asst. Prof., Dept. of English, KCK liasü.

Asenoki kechi yimyatem mesamai yuner? Asenoki kechi yimya indokner? Aser koba yanglushir wazüka ayutsüla? Asenoki nungdakba yimsü wazüka ayutsüla aser menüngdakba tem indoktsüla, ta lai ashi.

ajanga tarur pela agizükba o jembir aser Meribeni, Girls Welfare Secretary ajanga International Women's Day bilemteta o tatsüka jembiba liasü.

Iba sentong ya Kohima College Students' Council (KCSC) & Cultural Cell, KCK ajanga ayongzüker.

Pei sobaliba angatetba aser akumtsüboba ya dangar sobaliba angatetba aser akumtsübo tetenzükdak lir, anungji iba amala sentong nung anguba maangka tem amshitsüla, ta ashi.

Gwanyele Kent ajanga sentong tenzüka sarasadem aser Iteibuibo, Social & Cultural Secy., KCSC ajanga melepzüng o jembir. Iba sentong nung Sameer Khati menden liasü aser Zeliangrong Troops ajanga sobaliba tsüngsang agi shilem agi, Sogwalo Seb-i flute amshia shilem agi, KCK nung Chakesang students temi sobaliba ken ka aten, Arola aser Akhrienuo nati Folk fusion ken ka aten aser Thejavizo Venuh lenisüba kübok ethnic fashion show ayongzüka liasü.

Omen nung ajemdaker iba sentong nung jembidang Keditsu-i asen sobaliba tera tonga bushitsü, shia arudaktsütsü, menüngdakba tem indoktsü aser tanaben meyipzüksü nungdakba indang ashi.

Iba ya ajanga sobaliba balala tsüngta apu alatsü aser temeimtep adoktsü, ta Dr. Keditsu-i ashi.

Iba sentong nung Keneilela Neikha, Vice Principal, KCK

37 Battalion BSF ajanga osettsüset lema agütsü



Kohima, Metsüremi/March 13 (TYO): Temeket nung aliba nüburttem nem teyari agütsütsü nükjidong nung 37 Battalion BSF ajanga March 13, 2023 nü Civic Action Programme ka ayongzüka liasü.

Chedema Model aser Keyake colony nung alirtem nem chair, table, chipo-aonpo, dustbins aser saisapong nung amshiba osettem lema agüja liasü.

Commandant-isa donation drive tem yak hen atema inyakba masü saka tarutsü anogotem nunga iba mesükba mapa inyaktsü, ta ashi.

Iba dak sendakba nung 37 Bn BSF Commandant Vinod Kumar den danga tanishir tem aser sepaitemi Chedema,

Iba sentong nung Kumar-i jembidang kidanger den jungtepa aliba ajanga terenlok balala aruba aser BSF ajanga nübür tenzüka indang lemsatepa liasü.

Nüngdakba mapang nüburttem yaritsü molunga lir, ta paisa ashi. BSF temi iba ama teyari agütsüba asoshi yimtsüng nung alirtemia pelaba lemsatepa liasü.

HSLC paper leak: Assam...

(TAPAK 1 NUNGI...)

Külen, Sivasagar MLA Akhil Gogoi-i education minister mapa nungi anentsü takhangba agütsü.

Iba tatalokba atema police tsüngdang ken o ka benokogo aser CID nem bushisüngdang südaktsütsü ta Education minister Pegu-i ashi.

Kinük ajaklen nungi aitsüba ajanga SEBA-i March 30, 2023 nü Science paper tatidang agitsü anogo melenshiogo.

Kaketshir lakh pezü shi kati Assam Class 10 board 2023 tatidang agütsür.



March 13, 2023 nü Parliament nung Budget senden agiba mapang nung Parliament House kima Rajya Sabha nung Opposition Lenir, Mallikarjun Kharge leniba nung opposition party balala nungi MP temi osangbenertem den jembidang tangokba noksa nung angur.

Democracy raksatsürtemi democracy kümzüksü atema jembir: Kharge

New Delhi, Metsüremi/ March 13 (Agencies):

Hombarnü Parliament nung Congress Party Tir, Mallikarjun Kharge-i BJP-i aniba sorkar aija, linük democracy raksatsürtemi democracy kümzüksü atema jembir, ta ashi.

Paisa, Ato kilonser Narendra Modi ya kijai tashi amshir ka, ta aitsü.

BJP-i, Rahul Gandhi-i bendanglen democracy dak sendakba nung India tenüng menüksüogo, anungji pai tatok meshitsüla, ta takhangba agütsüba sülen Kharge leniba nung BRS, Left parties aser AAP densema opposition party balala nungi MP temi Parliament House complex

nungi Vijay Chowk tashi longkak aita jaja.

Tawa London nung Rahul Gandhi-i, India nunger democracy raksatsür aser linük nung reju balala anema inyaker, ta jembia liasü.

Vijay Chowk nung osangbenertem den jembidang Kharge-i, "Parnoki (BJP) democracy raksatsür saka democracy aser linük akhümket indang jembir," ta ashi.

Paisa, "Parnoki agency balala tim mesüi amshia opposition party tem anema inyaker. Iba ya chipo-i 'kettle' dang na tanak, ta ashiba den kasa lir," ta Kharge-i ashi.

Kharge-i, Ato kilonser

Modi-i bendanglen India aiben tenüng menüksüogo, ta shia China, South Korea, Canada aser UAE nung Modi-i tamalen jembiba otem metetdaksü.

Ato kilonser kati India anema item ama oji jembira Rahul Gandhi-ia jembiba nungji kechi tai ali?, ta pai asüngdang.

"Adani ken o bushisüngdangtsü atema onoki JPC akhanger. Sorkari iba onük paidoktsü meranger. Onok longjema lir aser maneni Adani ken o bushisüngdangtsü atema JPC (Joint Parliamentary Committee) akhanger," ta pai metetdaksü.

Hombarnü Parliament nung Budget senden tanabuba shilem tenzükogo.

India tenüng menüksüba atema Rahul-i tatok meshitsüla: Rajnath Singh

New Delhi, March 13 (Agencies):

Hombarnü Parliament nung Budget senden nung ruling party nungi MP temi, tawa Congress lenir Rahul Gandhi-i London nung jembiba o atema pai tatok meshitsüla, ta takhangba agütsü.

Lok Sabha senden tenzükli Defence Minister Rajnath Singh-i nokdaker, Gandhi-i London nung India nunger democracy indang jembidang India tenüng menüksütsü merangogo, ta ashi.

Rajnath Singh-i, "Lok Sabha nung züngsem, Rahul Gandhi London-i ao aser India tenüng menüksütsü meranga, India nung democratic inyakyim ajak raksadar ta jembia. Paisa, bendangertem India nunger democracy kümzüksüla, ta jembigo," ta metetdaksü.

Iba House-i pai jembiba oji aitsütsüla aser pai tatok meshitsüla, ta BJP lenirisa ashi.

Parliamentary Affairs Minister, Pralhad Joshi-ia, linük nung Emergency sangdonga temeden balala agienba mapang nung democracy kong liasü aser UPA sorkar mapang

Union Cabinet-i agizükba oziung ka Rahul Gandhi-i shisadang democracy kong liasü?, ta asüngdang.

Lok Sabha Speaker, Om Birla-i, India nunger democracy tashi taitba dang kümдар, ta ashi.

Iba sülen Congress MP temi sashia longkak aitba mapang nung Speaker-i nikongdang 2:00 ako tashi senden thinena liasü.

Budget senden nung sorkar anema nokdaksü atema Hombarneep Kharge leniba nung opposition party balala nungi MP tem senden mena asalentong yanglua liasü. Iba senden nungji Congress, DMK, JDU, AAP, CPM, KC, RLD, NCP, NC, CPI, IUML, SS (Uddhav), MDMK, RSP, RJD aser JMM nungi MP tem shilem agia aden.

Amongnü Rajya Sabha nung Opposition Lenir, Kharge aser Rajya Sabha Chairperson Jagdeep Dhankhar na senden mena budget senden atema o lemtep, iba sülen Kharge-i, twitter ajanga, "Parliament jakdang @VPIndia ajurua pa dang onok den amaliteptsü asüngdangogo," ta lemsatepa liasü.



Jammu, March 13, 2023: Jammu nung property tax anema Hombarnü Congress party nung züngsemtemi longkak aita dang police-i nokdangba noksa nung angur.

Punjab nungi aluyimertem MSP takhangba agüja longkak ait

New Delhi, March 13 (Agencies):

Hombarnü Punjab nungi aluyimertem aika New Delhi nung aliba Jantar Mantar nung adenshia Centre sorkar anema longkak ait aser Minimum Support Price (MSP) scheme densema takhangba balala agütsü.

Punjab nung aluyimer union pongu nungi züngsemtemi Jantar Mantar nung longkak aitba sülen Ato kilonser, Narendra Modi dangi züluba

temepishiba shidi ka ketdangertem nem agütsü.

Temepishiba shidi nungji aluyimertem Ato kilonser dang, aluyimba nung amshitsü atema tzü kasa lemsa-a agütsütsü aser Centre sorkari nangzükba ama tekaraba nung Minimum Support Price (MSP) scheme mapa küma inyaksü mepishia lir.

Osangbenertem den jembidang Punjab nung Tarn Taran district nungi aluyimer,

Jarnail Singh-i, "Onok takhangba onüktemji kasa dang. State nung aluyimertem nem tzü shidak lema agütsütsüla," ta metetdaksü.

Paisa, "Tzü ajakji Rajasthan aser Delhi-i aoer, anungji Punjab nunger aluyimertembo kechi inyaksü? Tang tashi sorkari menjang aser wheat nung MSP agütsütsü atema kecha meinyak. Onok aluyimer kibongtem timtemer," ta metetdaksü.



Patna, March 13, 2023: Hombarnü Bihar assembly nung budget senden amendang Communist Party of India (Marxist-Leninist) MLA temi kima longkak aitba noksa nung angur.

AAP-i party lenir ana apuba anema signature campaign tenzükogo

New Delhi, March 13 (Agencies):

AAP nung lenir ana -Manish Sisodia aser Satyendar Jain na nem ochimashi tai tonglokja apuba anema Hombarnü AAP-i signature campaign ka tenzükogo.

Signature campaign ji Laxmi Nagar nung aliba Metro station anasa tenzük. Iba sentong nungji AAP Delhi Convenor, Gopal Rai-a liasü.

AAP-i, Delhi nung health aser shisaliok tsütsü sorkari mapa tajung inyakba nokdangtsü atema minister ana-Jain aser Sisodia na apu, ta metetdaksü.

Sisodia aser Jain na anema tiyazü nung tai tongloktsüba nüburtem nem metetdaksütsü nükjidong nung AAP-i signature campaigns ayongzük.

Senotsü dak sendakba ochimashi ken o nung Jain Tihar jail nung puoka lir. Pa yaküm May ita nung pua liasü.

Delhi excise policy ochimashi ken o dak sendakba nung CBI-i February 26, 2023 nü Sisodia apu. Delhi Excise Policy, 2021-22 ya tangbo agienogo.

Tena apuba sülen tenati minister menden tokja Delhi

Cabinet nung anen aser tang tena melen Atishi (Education Minister) aser Saurabh Bharadwaj (health Minister) na shim.

Ano tanga osang ka nung, Hombarnüsa BJP lenirtemi Rajghat nung mener longkak aita AAP tongti aser Delhi Chief Minister, Arvind Kejriwal-i CM menden nungi anentsüla, ta takhangba agüja longkak aitaogo.

Delhi BJP lenirtemi Delhi excise policy ochimashi ken o dak sendakba nung Kejriwal-i Chief Minister menden toktsütsüla, ta takhangba agütsü.

Delhi BJP unit-i twitter ajanga lemsatepba noksa nung lenirtem jagi 'Kejriwal' er minister ana jail nung puokogo. Kejriwal nai menden nungi anentsüla' ta ozülu amer lir.

Delhi nung aliba Tihar jail nungi Sisodia-i, "Tulur, nenoki ni jail nung puokba ajanga ni timtemdaksütsü akok, saka nenoki kü tanelabo meraksatsütetsü. British nunger yimsüsürtemia linük nüchiso atema rarartem nem timtem agüja liasü saka parnok tanela meraksatsütet. Jail nungi Manish Sisodia-i lemsaba osang," ta metetdaksü liasü.



TIR YIMYIM YIMOBILEM (EDITORIAL)

DIMAPUR SANGTENNÜ, METSÜREMI (MARCH) 14, 2022

Asenok ajungtsüago

Küm 150 jakdang British nunger yimten tashi aser America nunger ajanga Tsüngrem temeim agi Ao lima matong asübo tang asenok aliba Ao lima ya kechi lima ka kümer lilar ta tsüinseta bilemer. Asenok o asenok na tsükchiteper aser tangari asenok makdokyonga arur ta asüba tia ka nung Tsüngremi British aser America nunger ajanga asenok ya kümzük aser tanü tashi tajungba-tajungba jenjang nung wazüka yuja lir. Aji oda, asenok tangar ket nung mesamanüba agi asenoki asenoksasa British nunger kübok alitsü bangjem aser asenok tajung kümnüba agi Yisu Khrista yimsü agizük. Alemli iba tangatetbaji Tsüngremi asen tsüraburtem nem agütsüba taochi liasü aser iba taochi nung Naga kintem rongnung kin tulu, tajung aser samanirsa tanü tashi Ao kin arudagi. Atangji, mapang aser anogo ajak kasa masü, anungji tanübo tangari asenok dak tamajung reprangtetba dang masü saka asenoksasa asenok agi nümamedangtetsüsa maparen aika nung mazüok aser tamakok agi sünga lir. Ibaji asenok tsürabur temoatsü nung tangar dang nungi jenjang temaba aser tajungba nung alidang Tsüngrem temeim amadoker asükümadokba agi asütsüa akok. Asenoki bilemdangtsüba tesüngmangtsü mapa kaji asenok ya tsürabur tajung chir agi tamajung akümba purtem lir. Aji kechiba? Asenok ya sayu machi chir asü, mesayu chir? Tsüraburtembo tsüngsema masem tetsüng agi jajaa nübortem tenzük. Kaketshisatsü tera angazükbajia kerosene atsükba milen 'lantern' tesangwa nung mesüra itaya nung mesüra anepdang sangwali aser nikongdang anü mai tsüngda aritepa kaket azüngba aser bushiba agi liasü. Iba ama tia ka nungi tanübo süoshi tajung agir, tsüngsem semer gari nung jajar aser mapa inyaksü asoshi anüngdang aonung kecha mali teti tesangwa lir. Tsüraburtem asoshi alo aser dal aonji jenjang aketba chiyongtsü liasü. Benjong nung achiba dak alaka küm piyong shi ango mechii süngolemba agidang pelatepba kibong mesüa aru. Iba ama kibong nung aonung shia kibong tekülem agi aser kidang metsütetba kiset shiruru aser alu nungi züsentetba aonsutsütem tenla kidangi tenla bener aru. Yimtak kibong kar shilumanem agi tonger alu meinyaktetsüsa kümra, kecha balaka shisabolutsü mali, yimer, kiyonger aser kinunger adianurtem ayongteper par luji angati inyaksü. Iba ama yimtsüng aser kibong nungi intetba chirnurtemji asenok ser nung, tanübo asenok taküm aser kibong agi asen tsürabur taküm yimya aser kibong sobaliba memesük kümogo. Tanü asenok jenjang tajung nung alirtem ya teimbaka Tsüngrem tenzük, school tesayur aser mezüng government ita sen chia tenzük chinurtem lir. Tsüraburtemi item jenjangji meranga inyakba agi aser tangar tajung kümdaktsütsü khuret bona inyakba ajanga ngutetba jenjangtem liasü. Aji oda, tsüraburtemi asenok nem yutsüba senmangtemji yimtak parnokiyangluba süra ki to masü aser parmoki ayimba tekong lu toa masü saka meranga inyakba, ochishia aliba aser Tsüngremi koda parnok meima kümzük, yamaji parnokiyang tangar teküpok jenjang nung tesamar aliba purtem kümzüktsü asoshi khuret bona inyakba mapatem liasü. Aji oda, itemji tanü asenok aser asen chirnurtem senmang asütsü tim. Ajisüaka, kenü asenoki sen tera aginü dang, kenü mashilen nungi mapa tilaka aginü dang aser kenü takok tilaka ngunü dang, oda oda mapa meinyaki sen agizüka asenok takar akümtsü merang, sen agi government mapa ali aser taila vote aser tashiyim agi takok angutsü merang. Iba jagi asenok repranga lia ajungbena takar aküm aser ano ajungbena sensaker aküm ta tanübo asenok ya asangsang nung masü pongmang lima nung alir amai kümogo. Joko, item jenjang makaba mapa aser mapangtem ya süitema yokdi. Atangji, asenok ajaki tajung kümner, anungji mapa tajung aser shitak dang inyakner, ajisüaka makoker ta asüba jenjang nung asenok lir. Iba tebilemstü ya koktettsü atema asenoki tamasa tsürabur senmang amangtsüla. Tsürabur senmangji Tsüngrem yimli nung tanüla khuret bona tangar kümzüktsü aser jungdaktsütsü asoshi inyakba. Tsürabur semangji tangar nungdak reprangteta agütsütetba aser asen tsürabur senmangji tangar meyong agi takar akümtsü merangba jakla masü saka asen akaba tangatetba aser tashitemet agi tangar takar aser tajung kümdaktsütsü merangba mapatem lir. Tanü item senmangtemji asenoki shia arua amangtetsü. Aji takoktsü. Asenok ya majungbo masü saka tatidang makokerba dang lir. Asenok ajungtsüba mapang anasai arudagi. Iba mapang tajungji tesem ka nung kenü asenok rongnung nisung kati ochi mapa tilaka inyakba nungi tenzüktsü, aji shiba asütsü?

OLEMSABANG


ELECTION YA YIMSÜSUR SHIMBA MAPA MASÜ YIMMAKBA MAPA KA KÜMOGO

- T.Nükshi Yaden Tuli

Democracy lima ka nung yimsüsüba menten shimtsü asoshi küm 18 nungi senso ajaki pei temeten (vote) agüja lir. Saka tanü asen Naga lima election kodang repangdangtir kanga mejungi raksatetogo. Kodang election arulir asen sabaliba yimsü yempong tajung ajak tezügen nemenodaktsür pei ajung asaa inyaktepba mazüokba yimya aika asenokin penshia inyaker. Tongtiapangsa yimdak yimtsüng nung putu yimsüsuri sen yung senso ajak yuka achir aser par tashi amshia amokpanga yur nepur nem pei temeten amshai inyaksü alenpanya ayur, yimsüsutemi sobaliba yimsüyimpongto amdoker yimer. Tashi Taiter nisung, mapa tamajung inyaksü mongentem meimchir taküm tashi samatsütsü mapayurtem nem tashi (power) agüja tashiyen amshia nepur arakmoktsü mapa nunglaktsür item pur nem sen talupasa agütsüa aser iba sen aser tashiyim amshia yim kati ka amokpanga ayutsü asa lentong tamajung injang bom tene amshia inyakteper. Yim tulu temi anasa aliba yim tilatem putu yimten tashi amshia amokpanger (coup) par inyaknutsü inyaktepba tesem aika nung atalakba angur. Alima nung nisung tamajunger asoshi mapa kecha nunga nungdak madoker, saka parnok mapa ajak agi tamajung inyaksü aser nisung tepetsü tashi parnokiyang kecha apayua mali. India lima nung koba dang Gonda Raj /Mafia ta ajar iba mapa tamajung tensa asen Naga lima nung penakogo election mapang nisung taküm pua pener oa tepseta indokba yabo Naga nungertem sabaliba ten ken yungi mapetba mapa ka inyakteper. Küm pongo asoshi yimsüsüba menden raktedang asen sobaliba meraket yimsüyimbong ajakto amadoker nisung tamajungertem nem aküm agüja par sünütsüsa par jangraba ajak inyaksü maongka agütsür, saka election temerbo item puri tim masüba inyaktang yimten temzüng sabaliba to amshia inyaksüsa akümdang yimsüsüba nung koda masü kuma yimten tashi mait atentsü.

Ano yim kar nungbo party tenüng atemen tangar nisung ayungtepba telok tulu yanglur pei yemdaki prangpong injang bom tena pener yimer temeten vote rakzüka agitsü atema yimmaker anir arua inyakba yimya item ama yaba yimer ajak longjemer putu yimsüsüba tashi amshia nükdangtsü temeten amshitsüla. Ajioda yim tilatemjia election mechit yemti tulutemi amokmerena pei temetem wazüka meyuteti amoshidaktsüba ya kanga arok aroka shisadangtsü nungdaker ner yim telongtet nung ner satemsatema yimsüsüba sabaliba tajung wazüka meyuteti election yimmaker nem ner yimkong makzüka pener yukbaji menukdangtetra ner meraket yemsusubaji kong lir. Ajioda suaka tanu asen Ao lima yim aika nung candidate temi putu yimsüsür sen jenti aguja alizüka ayutsü meranger aser yimsüsüri par taginuba rongsen jenti agir yimer ajak arakmoka ayutsü asa lendong yanglua inyakteper. Candidate kari sen jenti indoka yimsüsür aser nisung tamajunger pari aginuba (Demand) rongsen aguja tangar vote makzüka (coup) pa mesura la asoshi taküm pendanga aguja inyakdaktsür iba mapa ya anu murua pua aoyaba / rakzükraktemba mapa ka lir, sura item ama ampangyim mapa inyaka shimba MLA kati ni nepur melunga shimba lennir ka ta Tsüngrem aser meimchir matsüngdang nema danga litetma aser itempur madak Tsüngremer azükaro Temoatsü litima item yimsüsür temi nepur asoshi nungdakba terenlak mapa inyaksü teyimla lirima. Election temogo saka sabaliba putu menden yemsusubabo teti alitsü, aji oda yimsüsürtemi koda nepur matsüngang nema danga yimten yimli mapa inyaksü pilemdangang, aseni election sen meshia agibato shingaia memetet amai pilema lira aji tai nai sen kwi agi metetadokgo kechi aser senji mepong nung aru mesura anung nungi tsükba bo masua to. Ano tongtipang kaji ner lima ner yimdak ner meraket yimten yimsüsüba wazüka meyutetba maksüji kong nungi lua arutsü aser nepur matsüngdang kota nemadanga yimsüsüba keno jembitsü, item tashi mait tamakak otsü alima matem tashi jembitsü. Aolima shir yimtsüng nungsa ibala tensa tia ajurua amshia inyaktepogo küm 5 shai iba electionsa ajurutsü alinung kanga shisadanga election mechit asen Aoer sabaliba yimsüsüba meraket raksaa meyuki yimtsüng shiai pei temeten wazüka ayutsü ken zünyangshiti.

Putir Stan Swamy atema signature campaign nung nisung 3000-i sign süogo



Ranchi, March 13, 2023 (Agencies): Khristan putir, asür Stan Swamy atema ochi temeden takhangba agüja tenzükba signature campaign nung nisung 3,000 dak temai sign süogo.

Signature campaign ya taküm February 25 nü Jharkhand state yimtiba, Ranchi nung tenzükba liasü. Iba state nung Swamy-i tribal nisungtem küm aika tenzükba aruogo.

Jesuit putir, Thomas Kavala-i, "Linük nung kiralongra anema benokba ozüing tesashi Unlawful Activities Prevention Act kübok tai tonglokja Father Swamy aser tangartem anema ken o benoka liasü. Onoki parnok atema ochi temeden akhanger," ta metetdaksü

India nung bushisüngdangba agency, National Investigation Agency (NIA)-i Stan Swamy-i linük anema inyak, ta tai tongloktsüyonga Massachusetts nung amenoka aliba digital forensic firm- Arsenal Consulting-ibo tawa report ka ajanga, iba ken o nung Swamy

nem tai tongloktsütsü atema nisung kari digital kuliji Swamy indang computer nung inoka yutsü, ta metetdaksüogo.

Osangbenertem den jembidang putir Kavala-i, "Bushisüngdangba agency-i metetsümonga iba ken o nung Swamy nem tai tongloktsü, ta tangbo asenoki metetogo, anungji iba ken o nung pa den tangartem nem ochi temeden agütsütsüla," ta metetdaksü.

"Onoki sorkar dang Swamy densema tai maket nisungtem anema tai tonglokja alibaji agientsü mepishir, aser iba ken o nung tai tongloktsütsü atema inyakertem nem temerenshi agütsütsü akhanger," ta paisa metetdaksü.

Tang agiba campaign ya Ranchi nung tenzük aser maneni state tesem ajaklen agitsü tebilemba lir, ta metetdakja Kavala-i, "Onoki state tesem balala nung senden 1,000 shi ayongzükba putir Swamy-i tenzükba nüburtem den jembitsü," ta metetdaksü.

Iba campaign

ayongzükertemi signature campaign nung tajemba agia sign 1,00,000 bosa bendentsü nükjidong lir, iba sülen Jharkhand state nungi tribal rongnungi tang mezüing linük Tir,

Droupadi Murmu nem agütsütsü.

Jesuit putir, Swamy ita 8 tashi tepuokdak liasü, aser pai bail meshiba temepishiba ken oji court-i angadangtsü lia pa süadok.

Swamy-i tribal nüburtem temeden atema inyaka aru aser 2018 küm pai India nung kin balala tsüingda rara adokdaksü, ta pa nem tai tonglokja apu.

Swamy ya Parkinson tashidak densema tashidak balala agi shiranga liasü saka pa nem bail magütsü jail nung ayu. 2021 küm May ita nung pa dak coronavirus tashidak putetba sülen pa hospital nung treatment agi aser temelungjang tashidak-a adoka liasü.

Pa Unlawful Activities Prevention Act (UAPA) kübok apu; iba ozüing kübok ken o mangadangi tepuokdak ayutsü akok.

Khristan putir, Swamy-i Maoist telungpurtem den tesendaktep ayu, ta pa nem tai tonglokja liasü.

India nung UAPA ozüing ya longkak aitertem, osangbenertem, kaketshirtem aser tangartem anema amshia nisung aika puogo, aser iba ya melung masürtem ola madokdaksütsü atema lir, ta aikati ashir.

ANOGO ABEN TSÜNGREM DEN

Solomong dang tuluba

- T. Ken 72: 1- 11.

Tenüingsang Ken 72 ji Solomon atema zülu, tebilem nung pa chuba süa aliba mapang zülu südi. Saka iba ken reprangra asenoki Solomon dang nungi tuluba ka angur- Yisu Khrista. Ken züluri kechi ashir, " O Tsüngrem, nai ne o bendang chuba nem agüjang" (T. 1). Shidakba nung pai iba Ken nung temeshiba indang ishikaben tetshia lir. " Anungji Pai ne nübur temeshiba agi o bendangtsü" (t. 2). " Ita marem tashi Pa anogo nung temeshipur arentsü" (t. 7). Yisuji Tsüngrem temeshiba lir. Ken züluri Solomonji temeshi nisung ka südaktsünü. Chubai temeim aser ochishia o bandangdaksünü. Yisu Khristi kodanga aibelen masü. Pa asen temeshiba aser Pai kechi temeshi aji inyaker.

Tanabuba, tezüluri temeshiba indang jembidi "Tenem talangi nübur dangi yimjung bener arutsü, aser tenem tilai temeshiba bena arutsü" (t.3). "Ita marem tashi pa anogo nung temeshipur arentsü, aser tesünep jenti arentsü" (t.7). Yimjung meteni asenoki temeshiba akatsü akok. Asenoki sepoy yoka ozüing raksartem rishikangshitsü akok. Saka temeshiba medeni asenoki yimjung angutsü makok. Yimjung dang tama asenoki Tsüngrem den temeshiba akatsüla.

Kibuba den temeshiba aser yimjung indang lbri shiti nung ashir. Yisu temeshiba aser yimjung chuba lir. Ano Pai taküm bener arutsür. "Ayi leper aliba dak tsünglu ajalok ama, tsünglubui ali tayi kümdaktsüba ama Pa alutsü" (t.6). Lisem lima ama asenok temulungjang takong süa aliba anogotema asenok kaa aruogo. Saka Kibuba temoatsü tsünglubu yok aser asenok dak tejang tangutsü. "Au, chuba ajaki Pa tsüngdang apudaktsü: kin ajaki Pa tenzüktsü" (t.11). Asenoki Solomon dang tuluba külemer aser tashi angar.

Kenü Khrista alima nung Pa yimli yangertsü. Pa temeshiba yimsüsüba ajanga pai yimjung bener arutsü. Tanü pai pa yimli tamanger mulungjang aser taküm nung pa yimli yanger. Pa temeshiba ajanga, ne mulungjang nung Tsüngrem yimjung akatsü akok. Na iba yimjungji lir ma?

Kaduna nung Baptist pastor ka jabaso khaset aser kinüngtsü puer ao

March 13, 2023: Taoba Hokolbarnü (March 10) prangpong amer telok kati yimtsüing ka nung pastor ka jabaso khaset aser pastor kinüngtsü den tangar asem puer ao.

Hokolbarnep Nigeria kübok Kaduna state nung Karimbu-Kahugu yimdak prangpong amer telok kati Baptist Arogo ka nung pastor ki mita aoba mapang pastor'er jabaso ibaji anema nokdakba agi parnoki pa khaset. Iba sülen parnoki pastor kinüngtsü den nisung asem puer ao, ta Kahugu National Development Associations nung

vice-chairman, Peter Mukaddas-i metetdaksü.

"Onoki sorkar aser security agencies dang puer aoertemji tekaraba nung kümzüksü mepishir," ta paisa metetdaksü.

Khristan temeden atema inyakba telok aikati Nigeria linük nung religious freedom jenjang tamajungba akümba anema ola adoker.

Nigeria nung Khristantem, meimchir temeden atema inyakba telok balala aser Congress züngsemtemi linük nung Khristantem kanga mejungi reshikangshiba osang

metetdaksüyonga taoba ita U.S. State Department-i countries of particular concern (CPC) linüktem list nungi Nigeria agientsü telemetba agiogo.

US state Department nungi otongdar kati, "State Department-i maneni Boko Haram aser ISIS-WA telok na Entities of Particular Concern for religious freedom nung züngokogo. Item telok ya Foreign Terrorist Organizations (FTOs) aser Specially Designated Global Terrorists (SDGTs) nunga züngokogo," ta metetdaksü.



March 12 nü England kübok Cornish jila nung aliba St. Fimbarrus Arogo nung tetsür pastor tem nokdangtsü atema vote agütsütep dang tangokba noksa nung angur. Church of England-ibo Arogotem nung tetsüri putir inyaktsü melar.

Yaküm Nigeria nung Khristan 5,000 dak tema tepset

March 13, 2023: Yaküm Nigeria nung Islamic jihadist telok balalai Khristan 5,000 dak tema tepset aser Khristan 2,300 dak tema puogo, ta International Society for Civil Liberties & Rule of Law teloki metetdaksü.

Yaküm January nungi October ita tashi nung Nigeria nung Khristan 4,020 tepseta liasü aser iba nungjagi 2,650 bo Fulani aser Islamic kiralongrar teloktemi tepsetba liasü; Islamic State in West Africa Province, Boko Haram aser Ansaru teloktemi Khristan 450 tepset aser Fulani (Zamfara) auertem aser parnok dak nungi jakzükba telok balalai Khristan 370 tepset, ta Anambra nung amenoka aliba group Intersociety-i metetdaksü.

Fulani aser Fulani (Zamfara) auertem aser tanga jihadist teloktemji Nigeria sorkar den tesendaktep junga lir.

Yaküm item teloki Khristan 2,315 puer ao aser iba nungjagi Khristan 1,401 bo January nungi June tsüingda apuba liasü; July nungi October ita tashi nung Khristan 915 puer ao, ta Christian criminologist, Emeka

Umeagbalasi-i aniba telok Intersociety-i metetdaksü.

Khristan 2,315 puer aoba nungjagi shilem 10 shibo (231) pei kidangi meyipa marutettsüa akok, mesüra Islam yimsü agizüktsü memelungba mesüra akhangba ama sen magütsütetba agi tepseter asütsüa akok, ta report nung shia lir.

Yaküm Nigeria nung Khristantem tepsetbaji asadanga ita shia Khristan 400 dak tema tepsetba aser ita shia Khristan 231 puer aoba den kasa; mesüra anogo shia Khristan 13 tepsetba aser anogo shia Khristan 8 puer aoba den kasa, ta Intersociety-i metetdaksü.

U.S. Commission on International Religious Freedom (USCIRF)-i, Nigeria nung telok balala aser sorkar yimsüsüba tashi maitba ajanga religious freedom jenjang ano tamajungba kümdar, ta sangdongogo.

Tesüiba küm 20 tsüingda Nigeria nung Khristan 60,000 shi tepsetogo aser northern Nigeria nung nisung million 10 shi jenshiogo.

AO OSHI ANGAZÜKDAK:

TANÜ ANGAZÜKTSÜBA OJANG



Pen

(n) kümnabuba aluyimba lu, maipu (second year of jumming)

* Pen nung temerem tsük atener.

Penpu

(v) aginü, nükshi (liking)

* Rongsenbai rongsen kanga penpu.

OLONG PAITEP # 6455

15x15 crossword grid with numbers 1-19 indicating starting points for clues.

TIPLÉN

- 2. Teburtemi tejak nung awaba - (8)
6. T _ _ _ em - (3)
8. Tzük ayudak - (3)
9. Nüngdakba dang timba - (6)
11. Züina ao - (4)
12. Yangi tzü angur - (5)
14. Tangar dang nungi tali - (4)
16. Senyong masü - (6)
17. Oadokdi - (3)
18. Tzü tarok - (3)
19. Yimtaklir aikati iba ya ki den külemi yanglusemer - (8)

LANGTSÜNGLEN

- 1. Temejangdak - (6)
3. Nisung ka mapa inyaksü nübo - (4)
4. Azüntsü asoshi mejemba - (6)
5. Tesangwa agütsüba - (5)
7. Tila masü - (4)
10. Tebenjem tetsür chanu - (4)
11. Tekolak nung inok - (4)
12. Tetsüngda - (6)
13. Tangar inyakba ka inyak - (6)
14. Tim masü ta ashi - (5)
15. Asalendong - (4)
16. Tanü dangtsü - (4)

OLONG PAITEP # 6454 TELANGZÜBA

TIPLÉN :

- 1. Telok, 4. Aluru, 6. Ozüng, 8. Emk, 9. Kin, 10. Teti, 12. Süir, 13. Jen, 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioktsü, 5. Lenti, 7. Tajangzük, 11. Teronem, 12. Sempa, 13. Jahaz.



ALOKBAER KIBONG ELECTION SEN AYÜTSÜ SHISABULUR

Alokba : Hai kinungtsü, candidate dang vote alitsü sen five lakh meshiba to ni shinga nema magütsü, aleper ayuji sento aika anungogo, ano asen atemabo 20 lakhs meshiba tobo yamato sur yua lir, ya koda asütsü.

Kinungtsü : Aya mah! Shisabulu tulu, tangbo Arogoi ah election memerukba rongsen bener taru asür, kong ayutsü ah nah.... Ki yangludi asüyonga temolung animesungzük taküm beyond koda alitsü, asen chinur aser semchisemnur tengah olangtsü makatsü ki oset aser süoshi aliyonga tangari metettsü, koda masü kümogo. Joko obay maliji, asen kiyonger leper alitsü jembidar yangji tengah inoksemdakjang .

Alokba : Aya shidak ah. Kinungtsü, election nung sen meshia agiba ya kangasa majung ah, anungji tang nungibo aruyaa aliba election nung jibo sen yong masü ochishia asen temeten vote agütsütsü Tsüngrem dang Sarasadema atadi, Aser election nung menaba tai nangzüktsü anogo asemnü tanga prayer centre ka bushia odi, aji masü nungbo asen kibong ya majungtsü.

Kinungtsü : Shidak ah, nasa tabensaba!

Lilir : WhatsApp

'Raj Bhawan Chalo' sentong agidang Assam Congress president apu



March 13, 2023 nü Assam Congress züngsemtemi Guwahati nung lungkak aitba angur.

Guwahati, March 13, 2023

(Agencies): March 13 nü Assam Congress lennirtemi lungkak aيتدang state president Bhupen Kumar Borah dena Congress lennir aika apu.

Narendra Modi'er sorkari financial bodies balala ajanga senotsü tim mesüi amshiba atema Opposition party Congress-i lungkak ait.

State president Bhupen Kumar Borah-i anir Congress

züngsemtemi 'Raj Bhawan Chalo' sentong agidang police-i parnok apu.

"Onok Raj Bhawan leni moudaktsü. Police-i onok noktang" ta Congress MLA Jakir Hussain Sikdar-i ashi.

"Police-i onok apu aser Latasil Police Station-i anir ao. Iba sülen onok PR bond ka nung chiok" ta pai ashi.

Iba sentong nung state working president Rana

Goswami aser MLA Rekitabuddin Ahmed na den lennir aikati shilem agia liasü.

"Nübertemi State Bank of India, LIC nung tamang kaa sen benden saka Modi-i aniba sorkari item rejutem nem tashiyim agi Adani'er company tem nung sen rizüngdaktsür" ta Borah-i ashi.

"Asen prime minister-i China, Sri Lanka aser Bangladesh nung dang Adani'er company nem mapa agütsütsü mepishiba meteta lir. Congress MP temi Parliament nung iba onük benoktsü merang saka BJP-i noktang, iba jagi Opposition party-i yimdong nung lungkak aittsüsa akümer" ta Borah-isa ashi.

"LIC aser SBI nem tashiyim agi Adani'er company tem nung sen rizüngdaktsüba bushisüngdangtsü atema Joint Parliamentary Committee ka tentettsü Centre-i memulunger. Iba jagi nübertemi ochi metettsü atema onoki yimdong nung lungkak aittsüsa akümer" ta paisa metetdaktsü.

Manipur nung NRC aser Population Commission atema lungkak ait

Imphal, March 13, 2023

(Agencies): Manipur yimtiba Imphal nung National Register of Citizens (NRC) mapa tenzüktsü aser Population Commission ka tentettsü takhangba agüja lungkak ait.

Lungkak aitertemi CM N Biren Singh'er ki aser Raj Bhawan-i aotsü merangdang police-i süng agi züka senshidaktsü.

Manipur kübok tenemlen nütsüng yongsük kanga teimba akümba, yimtsüng tasenten tentetba, poppy lu ayimba aser reserve forest areas atsünga agiba atema kaketshir teloktemi

tebilemtsü abener.

Linük aser tangalen nungi ainertem aruba ajanga Manipur maitsü, sobaliba, rongsenketzüng, ketdangsubaren aser lipoküm nung kongshir, ta kaketshir teloktemi metetdaktsü.

Parnokisa Myanmar, Nepal aser Bangladesh nung arurtem jangjar meyipa yoktsü takhangba agütsür.

Centre dang Manipur nung National Register of Citizenship inyaktsü atema state sorkari rongshiang ta kaketshirtemisa ayongzüker.

"Onoki kin mesüra tamangba yimsü anema noktaker masü

saka ozü al, lipoküm aser lisopurtem küzmzüka yunür. Onoki ketdangsurtem dang reserved forest areas atsünga agirtem meindoktsü ayongzüker" ta kaketshir teloktemi metetdaktsüogo.

Tenemlen Manipur Land Revenue and Land Reforms Act lir saka nütsüng yongsük teimba akümba ajanga state nung lisopurtem asoshi timtem bentsür arutsü. Anungji Manipur nung population commission ka tentettsüla aser bendangertem jangjatsü atema NRC mapa tenzüktsüla ta kaketshirtemisa ashi.

Manipur auto-rickshaw driver ka ket nung Rs 3 crore drugs apu

Guwahati, March 13, 2023

(Agencies): Manipur Police-i auto-rickshaw driver ka apu aser pa ket nung Rs 3 crore alang drugs bena lia apu.

Hombarneep Myanmar den arrtsü anasa iba nisung apu ta police-i ashi.

Arrtsü adena orr nungi intelligence networks ajanga osang tejangja ka angazükba sülen Tengoupal district police-i

unregistered auto ka apu.

Hombarneep 8:30 ako meta NH-102 nung auto ji Moreh international border nungi Imphal leni aodang apu.

Iba auto mita repringdang bosta ka nung brown sugar seret 3 bena liasü. Myanmar nung yangluba sapon pongdang 73 nung mozüji miima enoka liasü aser regional streets nung Rs 3 crores shi alang asütsü ta police-i ashi.

Iba auto driver ya Samilien Baite (29) ta jangjaogo aser pa ya Tengnoupal district kübok Bongjang nung lir.

Manipur nung Yaoshang festival mapang police-i mita arudang brown sugar seret 6, WY tablets seret 4, heroin gram 906 aser opium gram 936 puogo.

Iba benjung mapang Manipur police-i poppy alu acre 48 tashi samatsüogo.



Assam sorkari "declared foreigners" ajak Goalpara district nung tasen yangluba detention centre-i belenogo. Silchar detention centre nungi tatemsabuba "declared foreigners" parnok 87 tashi Honibarnü Matia transit camp-i anir ao ta Assam Inspector General of Prisons Pubali Gohain-i ashi. Assam nung transit camps 6 nung puoka ayur ajak Matia transit camp-i anir ogo ta paisa metetdaktsü.

Pakistan indang taoba tir aser ato kilonser temi sempet ayuba osang sangdong

Islamabad, Metsüremi/March 13 (Agencies): Tesüiba küm 20 tsüngta taiba ato kilonser aser sorkar ketdangsür temi Toshakhana sempet agizükba osang Pakistan sorkari Deobarnü yimjak nung sangdongogo.

Sen million aika jenjang sempet agizüker ato kilonser aser tir tem rongnung Imran Khan, Nawaz Sharif, Yousaf Raza Gilani, Asif Zardari, Pervez Musharraf aser dangartem lir, ta record ajanga ashir.

Iba list nungya tang teinyakdak Ato Kilonser Shehbaz Sharif aser Tir Dr Arif Alvi densema lir. Kaket tapak 446 nung aliba record nungya 2002 nungi 2023 tashi Toshakhana nung sempet agizükbatem lir.

Pakistan nung aliba Toshakhana department ya 1974 küm amenok aser yangi bendanger tongtipang nisungtem aser sorkar nung tekolak temi yimsüsür, parliamentarians, bureaucrats aser ketdangsür nem sempet aser jenjang tulu aketba oset agütsübatem rizünga ayur.

Sempet aser danga jenjang aketba osettem aruba ketdangsür temi Cabinet Division nemo sang agütsüsüla ta ozüng agi ashir.

Ajisüaka Pakistan tir aser ato kilonser iba ozüng agi malener aser Pakistan nunger sen 30,000 dang tajemba sempet tem parnoki ayutsü akok. Pakistan nung tekolakba ana yangi jenjang tulu aketba sempet tem Toshakhana nungi sorkari jenjang asadanger shilem kar menoker sempet agitettsü akok.

Taoba ato kilonser Imran Khan-i Toshakhana sempet

tem aliba indang osang tejangja melemsatepba mechi ken o benoka jembia aruba yong iba department ya tawa ang tali jangjar. Khan ya ato kilonser inyakba mapang Toshakhana ta ajaba state depository nungi sen jenjang tulu aketba Graff wristwatch densema sempet tem jenjang tajemba agi alizüker pa ajanzüktsü asoshi ayokba ken o nung Khan dak tai tonglokja lir.

Imran Khan-i sempet aika agizükba indang record nung shia lir.

2018 küm Khan-i sen million 20 agütsür Graff wristwatch (sen million 85 jenjang), cufflinks ana (sen million 5.6 jenjang), pen ka (sen million 1.5 jenjang) aser ring ka (sen million 8.75 jenjang) ayu. Kasa küm pai sen 754,000 agütsür sen million 3.8 jenjang Rolex watch ka ayu.

Pai ano sen 294,000 agütsür sen million 1.5 jenjang Rolex watch ka ayu. Pai ano sen 338,600 agütsür sen 900,000 jenjang Rolex watch tasembuba ayu.

Iba sülen ano pai sen 935,000 agütsür sen million 1.9 jenjang watch ka aser aser sen million 2.4 agütsür sen million 4.4 jenjang watch ayuba shia lir.

Record nungsa Imran Khan kinungtsü Bushra bibi-i sen million 9 agütsür sen million 10 jenjang necklace ka, sen million 2.4 jenjang bracelet, sen million 2.8 jenjang ring ka aser sen million 1.85 jenjang earring tejang ana ayu.

Taoba Pakistan tir aser Pakistan People's Party (PPP) co-chairperson Asif Ali Zardari-ia 2009 küm January ita sen million 16.1 agütsür sen million 57.8 jenjang BMW gari

ka aser sen million 50 jenjang Toyota Lexus ka ayu. Paisa sen million 4 agütsür ano BMW gari (sen million 27.3 jenjang) ka ayu.

Zardari-isa sen 158,250 agütsür sen million ka jenjang wristwatch ka, sen 189,219 agütsür sen million 1.25 jenjang Corum wristwatch ka aser sen 321,000 aser prangbong ka agütsür sen million ka jenjang Cartier wristwatch ka ayu.

Taoba ato kilonser aser Pakistan Muslim League (N) tetsüti Nawaz Sharif-ia jenjang tulu aketba osettem ayuba sangdonga lir.

Asemben ato kilonser inyaksang Nawaz Sharif-i 2008 küm April ita sen 636,888 agütsür sen million 4.2 jenjang Mercedes Benz gari ka ayu.

2013 küm November ita pai sen 243,000 agütsür sen million 1.18 jenjang Rolex wristwatch ka ayu.

Pai 2015 küm January ita sen 240,000 agütsür sen million ka jenjang Piaget wristwatch ayuba shia lir. Iba den ano pai perfume box ka ayu.

Sharif-i 2016 küm January ita sen million 7.6 agütsür Christopher Claret watch ka (Rs 2 million), ring ka (Rs 19.5 million) aser cufflinks ana (Rs 16 million) ayu.

Pa kinungtsü Kulsoom Nawaz-ia sen million 10.8 agütsür bracelet ka (Rs 12.7 million) aser necklace ka aser earring tem (Rs 41.6 million) ayu.

2016 küm February ita Sharif-i sen million 3.2 agütsür deLaCour watch ka (Rs 3.2 million), ring ka (Rs 8 million) aser cufflinks ana (Rs 5 million) ayu.

(Maneni tapak 8 nung...)

OFFICE OF THE
MERANGKONG SENSO TELONGJEM TULI
P.O. Tuli Town - 798618
Dist. Mokokchung : Nagaland.

TENÜNGSANG AGÜTSÜR

Merangkong Senso Telongjem Tuli ajanga **Dr. Merangmenla**, asür S. Lanumeren aser Wt. N. Apokla'er jala Doctor of Philosophy, Chemistry nung ngutetba asoshi tenüngsang tulu agütsür. La-i züluba Thesis "2- Picolinic Acid based ID Copper (II) Coordination Polymer and its Polyaniline Composites toward Organic Transformations and Photocatalytic Degradation" nung ajemdaker National Institute of Technology Nagaland-i la nem iba Ph.D. agütsü.

Merangkong Senso Telongjem Tuli, ajanga tarutsü nung la taküm aser sempet nüburtem asoshi temoatsü südakang ta sarasadema atar.

IMKUMZUKBA President Merangkong Senso Telongjem Tuli.	MOASASHI General Secretary Merangkong Senso Telongjem Tuli.
--	--

Bakhmut nung nisung jenti asü-amaba osang lir

Moscow/Kyiv, Metsüremi/March 13 (Agencies): Ukraine anüdoklen metsü toba Bakhmut jila agitsü meranga meiloni süaka tanen makai raraba nung Ukraine aser Russia nati nisung jenti asü-amaba osang sangdongogo.

Ukraine-i tangbo raksatsür aser azüngmeyaka aliba Bakhmut anüolen tsütsü amokbanga lir aser Russia indang Wagner Group ajanga anüdoklen tesem timba amokbanga lir aser Bakhmutka ayong yimti alema oa aliba ya front line ama kumogo, ta British intelligence ajanga ashir.

Bakhmut section nung tesüiba anogo ishika tsüngta Russian sepai 1,100 dak tema tepsetogo, ta Ukraine Tir Volodymyr Zelenskyy-i ashir.

"Hopta ka majungdang March 6 nungi tenzüka asenoki Bakhmut sector kisüng nung tsükchir sepai 1,100 dak tema tepsetogo, yangi Bakhmut anasa Russia nunger takoksa tulu ajurua lir," ta Zelenskyy-i aonungshi video ajanga jembiba mapang ashir.

Russian sepai 1,500 shi kanga sashia yirua lir aser parnoki junga mezüngteter, ta pai ashir.

Russia indang defence ministry-ia par sepaitemi eastern Donetsk region nung military operation tali agir, ta shiogo. Donetsk region den anasa Luhansk meyokteper industrial Donbas ya akumer.

Russian sepaitemi tesüiba ghonda 24 tsüngta Ukraine sepai 220 dak tema tepsetogo, ta ministry ajanga ashir.

"Donetsk tsütsü Ukraine sepai 220 dak tema, infantry fighting vehicle ka, armoured fighting vehicle asem, gari asem aser D-30 howitzer ka raksatsüogo," ta ministry ajanga ashir.

Ita ishika tsüngta Bakhmut nung timtem aser takoksa jenti ajuruba linük anaprongi nangzüka lir, ajisüaka asü-amaba tejangja monguteter.

Bakhmut nung maneni rara nokdaksü ta Ukraine-i shijen shia arur aser commander temia yangji raraba ajanga meyiper amaksü asoshi renemtsü atema nüngdakba mapang angur, ta hopta tatemlen ashir.

"Bakhmut nung tensa majung, kanga majung, tsükchir temi metre ajak atema rarar," ta Wagner Group tentensang Yevgeny Prigozhin-i Deobarnü voice recording ka nung shia liasü. "Yimti tiyongleni aoba ama tali tesashiba rarar."

Bakhmut makdokba ajanga Ukraine nunger defence anokshitsütsü aser Donbas ajunga agitsü asoshi mera ka asütsü, ta Moscow-i ashir.

Ajisüaka Ukraine east aser south aser Donetsk nunga danga tesem tem nung kanga sashia raraba manener.

Myanmar army-i monastery ka nung nisung 28 tepset

Yangon, Metsüremi/March 13 (Agencies): Shan State nung Myanmar army-i monastery ka nung nisung 28 tepsetogo, ta telungpur telok kati ashir.

Sepaitemi Honibarnü Nan Nein yimtsüng nung bomb poklokja maka liasü, ta Karenni Nationalities Defence Force (KNDF)-i ashir.

Küm ana tejakdang military-i sorkar atsüngba sülen Myanmar nung telungpur telok balala aser military na tsüngda mapangshia raratepa arudar.

Rara tesashitem ya timba linük yimtiba Nay Pyi Taw aser Thailand den arrtsü anasa aliba tesemtem tsüngda raratepa arudar.

Honibarnü bomb pokloktsüba sülen military air force aser artillery yimtsüngi local mapang 16:00 shi nung ai aser monastery nung atsüka aliba yimdaklirtem tepseta liasü, ta KNDF-i ashir.

KNDF-i lemsatepba video

ka nung Buddhist monks temi asemba orange sentsü süoshi semer aliba nisung asem densema tasümgang 21 iba monastery nung bangteper aliba sayuogo. Tasümgangtem nung injang agi akhaba tarak aika nguogo. Video nungsa monastery indang jara injang agi khasar aliba sayuogo.

Local osang kaket Kantarawaddy Times sangdong ka ajanga KNDF otongdari ashiba agi, "military-i monk tem densema parnok ajak monastery jakdang tarensena nokdaksatsür khaset ama reprangtetogo,"

Iba telok yangi BBC dang ashiba agi, parnoki ano iba tesem temeket nung aliba yimtsüng tila ka nung tasümgang tenet ngutetogo.

Maneni temeket nung aliba kitem rongtoktsür liasü aser KNDF-i ashiba agi, iba ya military-i yimtsüng amakba ka lir.

KNDF-isa, yimdaklirtemi

parnok temeket nung ajaki akümtsümbua amshiba monk tem den jenokra parnok kümzüksü akok ta amanga liasü. Tanga yimdaklirtem sepaitem maru tsüngda jenshir liasü.

Iba tatalokba dak sendakba nung osang tejangja agitsü tasak, ajisüaka Myanmar kübok iba tesem nung nüburtem tauchi makai amakba ya tang tasen masü. Military-i sorkar atsüngba sülen iba tesem nung aliba nüburtemi military anema tesashitiba nokdakogo.

KNDF-i BBC dang ashiba agi, February 25 nü nungi tenzüka rartep tali kumogo, kechiyong junta sepaitem Nan Nein temeket aser iba tesem nung aliba monastery tem leni aika yokogo.

Nan Nein ya Shan state nungi Kayah state-i aoba tongtibangtiba lenmang lir aser junta-i parnok den raraba telungpurtem prangbong aser hadir belenshitsü asoshi iba lenmang ya kanga tongtibang ta

bilemer.

Iba tesem nung tsükchir kin; Pa-O, Shan aser Karenni nunger meyoktepa lir.

Pa-O National Organisation ya armed wing ka lir aser parnok ya iba tesem nung pro-junta telok ka lir. Local temi ashiba agi, iba tesem amokbanger aliba telungpurtem den raratsü atema army-i pro-junta ethnic militias tem nem teyari tali agütsü tenzüko.

Ita tsüngda telok balala tsüngda raratepba ajanga Honibarnü iba yimtsüng amaksü atema lenmang lapoktsüogo, ta observer temi ashir.

"Karenni teloki yimtsüng kar atsüngogo aser tang Myanmar military-i item yimtsüngtem makdar," ta Saung Pyaung outpost anasa aliba yimtsüng ka nungi ketdangsür kati The Irrawaddy osang kakat dang ashir.

Telok balala tsüngda raratepba ajanga nisung

meyirejang aika pei ki toktsür jenshiaogo, ta local aid teloktemi metetdaksü.

Myanmar military lenirtemi taküm election agitsü imlar aser iba ajanga par sorkar nem kanga dang nüngdaka aliba tashi kar agütsütsü ta bilemer.

Ajisüaka parnok anemertem mazüoktetba ajanga taküm election agitsü tamakoktsü kümdaksüogo.

Myanmar nung küm aika civil war adoker aruogo aser 2021 küm sorkar atsüngba sülen tensa tamajungba kumogo.

Tang tashi nung nisung million ka ser tesadang pei ki toktsür jenshiaogo, ki 40,000 rongtoktsüogo, tanur million ti school-i maoer aser nisung million 15 chiyongtsü agi anünger, ta UN-i asatetogo.

Military-i sorkar atsüngba anema nüburtemi nokdangba sülen nisung 2,900 dak tema tepsetogo, ta Assistance Association for Political Prisoners-i ashir.

Harry Brook nem ICC player of the month award agütsüogo



Dubai, Metsüremi/March 13 (Agencies): England nunger asayar Harry Brook nem February ita atema ICC player of the month award agütsüogo. Pai India nunger asayar Ravindra Jadeja aser West Indies nunger asayar Gudakesh Motie na ajateta liasü.

Kasa mapang nung tetsürtem rongnungi Australia tsür Ashleigh Gardner nem iba naroküm agütsüogo.

New Zealand Test series nung kanga junga asayaba sülen Brook-i iba naroküm tanabenbuba agizükogo aser tang tashi nung Pakistan nunger asayar Babar Azam tenati dang iba naroküm anabenben agizüka lir.

ICC women's T20 World Cup nung Australia-i takok tajung anguba sülen Gardner-i iba naroküm agizükogo. Taoba küm December ita iba naroküm agizüka sülen Gardner-ia iba naroküm tanabenbuba agizükogo.

February ita atema ICC Player of the Month Awards result ya 2022 küm December ita den mesükteper, kong tenapronglai kanga junga asayaba sülen mezüngbuba player of the month naroküm agizüka liasü, ta ICC-i ashi.

Gardner-i South Africa nung Women's T20 World Cup asayaba mapang tongtumbang run yangluba den mapang shia wicket agia

Australia team-i iba asayamung akokba nung tongtumbang shilem agia liasü. Iba asayamung nung la player of the tournament liasü aser T20I all-rounder ranking nunga la temaba jenjangi atu.

Kasa mapang nung Brook-i format ajak nung kanga junga asayaba den England team Test asaya nung astüingsashiba mapang pai tawa kanga tongtumbang shilem agiogo.

Media representatives, ICC Hall of Famers, taoba mapang international asayar, aser icc-cricket.com nung züngoksema aliba fan temi vote agütsüba sülen Gardner aser Brook nati iba naroküm agizükogo.

Border-Gavaskar Trophy:

India-i 2-1 agi asayamung kokogo

Metsüremi/March 13, makokba sülen India team-a 2023 (Agencies): India aser Ausrtralia na tsüngda Ahmedabad nung pezübuba test asaya draw nung tembangba sülen India-i Border-Gavaskar Trophy 2-lagi kokogo.

Iba asayamung nung asaya pezübuba nunga anogo ponguprongla asayaogo aser tatembangbuba anogo

Australia puri wicket ana out ser run 175 yanglur aliba mapang ojang dang asayatsü atema telok anapronglai mulunga asaya draw nung tembang. Asaya anenba mapang Marnus Labuschagne-i ball 231 nung run 64 aser captain Steve Smith-i ball 59 nung run 10 yanglur liasü.

Tatembangbuba anogo bowler tem rongnung Cheteshwar Pujara-a densema liasü. Test asaya 102buba nung Pujara-i iba asaya nung over tanabuba onogo. Asaya anenba mapang Shubman Gill-i ball ka oner liasü. Asaya nung Ravichandran Ashwin aser Axar Patel nati wicket kaka agi aser Travis Head-i ball 163 nung run 90 yanglur lia Axar-i pa out sütsü.

Maneni team ana ya The Oval, England nung World Test Championship final asayatsü, koba June 7 nü tenzüksü. Tasembuba test akokba sülen Australia final atema qualify ser liasü aser kasa mapang nung Hombarnü Christchurch nung Sri Lanka-i wicket ana agi New Zealand

Maneni team ana ya The Oval, England nung World Test Championship final asayatsü, koba June 7 nü tenzüksü. Tasembuba test akokba sülen Australia final atema qualify ser liasü aser kasa mapang nung Hombarnü Christchurch nung Sri Lanka-i wicket ana agi New Zealand

Maneni asayamung nung bowler tem rongnungi Ashwin-i wicket (25) timba agi aser pa sülen Jadeja (22) aser Nathan Lyon (22) na liasü.

Sindhu aser Sen nati anir All England Open asayatsü

Metsüremi/March 13, 2023 (Agencies): Nüngtugu All England Open Badminton Championship March 14 nü nungi tenzüksü renema lir aser linük balala nungi asayar tajungtibatem Utilita Arena nung adenshia temaba jenjang asoshi tokteptsü.

Iba asayamung ya March 16 nungi 20 tashi asayatsü kong kija asayar 128 aser team 96-i shilem agiba angutsü.

1899 küm iba asayamung tenzüksü sülen tang tashi nung India nunger asayar anati dang iba asayamung koka lir. Prakash Padukone-i 1980 küm iba asayamung koka India nunger rongnungi iba asayamung akokba mezüngbuba asayar aküm aser pa sülen Pullela Gopichand-i 2001 küm koka liasü. Saina Nehwal aser Lakshya Sen nati 2015 aser 2022 küm iba asayamung final tonga asayaogo, ajisüaka takok monguteti liasü.

Taküm iba asayamung tebur kija asaya taoba küm finalist Lakshya Sen-i anir asayatsü. Pa mezüngbuba asaya fifth seed Taipei nunger asayar Chou Tien Chen den asayatsü. Pai mezüngbuba round ajantetra pa tanabuba round nung Anders Antonsen mesüra Rasmus Gemke den asayatsü aser quarter final nung

Indonesia nunger asayar Anthony Sinisuka Ginting den asayatsü akok.

Kasa mapang nung HS Prannoy mezüngbuba round nung Wang Tzu Wei den asayatsü aser tanabuba round nung Ginting den asayatsü akok.

Tebur kija asaya nungsa Kidambi Srikanth mezüngbuba asaya Popov den asayatsü aser iba asaya kokra Japan nunger asayar Kodai Naraoka den asayashitsü akok. Shrikanth-i round anaprongla kokra pa quarter nung defending champion Lee Zii Jia den asayatsü akok.

Tetsür kija asaya nung Sindhu mezüngbuba round Zhang Yi Man den asayatsü. Lai iba asaya kokra la fifth seed asayar He Bing Jiao den asayatsü, shiba lai Tokyo Olympics bronze medal asaya ka nung kokogo. Maneni asaya kokyonga tura la Chinese Taipei tsür Tai Tzu Ying den asayatsü akok.

Kasa mapang nung 2015 finalist, Nehwal mezüngbuba asaya China tsür Han Yue den asayatsü aser iba asaya kokra sixth seed asayar Wang Zhi Yi den asayatsü.

Tebur tarep asaya nung Satwik aser Chirag Shetty na mezüngbuba asaya Marcus Fernaldi Gideon aser Kevin

Sanjaya Sukamuljo na den asayatsü liasü saka Sukamuljo temang manemba ajanga tena masayatetsüsa kümogo. Tena reserve nung aliba France nunger tarep Lucas Corvee-Ronan Labar mesüra India nunger tarepsa Krishna Prasad Garaga-Vishnuvardhan Goud Panjala den asayatsü.

Tebur tarep asaya nungsa MR Arjun aser Dhruv Kapila na China nunger tarep Ren Xiang Yu aser Tan Qiang na den mezüngbuba asayatsü aser iba asaya kokra Liu Yu Chen aser Ou Xuan Yi na den asayashitsü akok.

Tetsür tarep asaya nung Treesa Jolly aser Gayatri Gopichand na mezüngbuba round nung Thailand tsür Jongkolphan Kititharakul aser Rawinda Prajongjai na den asayatsü.

Tena den ano Ashwini Bhat aser Shikha Gautam na tetsür tarep asaya nung shilem agitsü. Tena mezüngbuba asaya Baek Ha Na aser Lee So Hee na den asayatsü.

Maneni tarep temeyoktep asaya nung Ishaan Bhatnagar aser Tanisha Crasto na mezüngbuba round nung Germany nunger tarep Mark Lamsfuss aser Isabel Lohau na den asayatsü. Tarep temeyoktep asaya nung India tenüng nungi tena dang asayatsü.

Pakistan indang taoba tir... (Tapak 7 nungi...)

Kasa küm October ita pai sen 469,000 aser danga oset kar agütsür sen million 1.2 jenjang Rolex watch ka aser ano sen 850,000 jenjang Rolex watch sa ka ayu.

2017 küm March ita Nawaz Sharif'er jabaso Hussain Nawaz-i sen 186,000 agütsür sen 940,000 jenjang Rolex watch ka yua liasü.

Kasa mapang PML-N tetsüti Nawaz Sharif-i sen 207,560 agütsür sen million ka jenjang diamond necklace ka aser table watch ka ayu.

2017 küm May ita Nawaz-i sen 808,000 agütsür sen million pezü jenjang Rolex

wristwatch ka ayu. Toshakhana records ajanga ashiba agi, taoba tir Parvez Musharraf-i 2004 küm sen million 6.5 jenjang sempet angu. Musharraf tir inyakba mapang sen jenjang tulu aketba watch aser jewellery box tem ngua liasü, koba pai nüngdakba ama sen agütsür ayu. 2007 küm January ita pai sen million 1.4 jenjang sempet ngua liasü. Musharraf kinungtsü Sehba Musharraf-ia 2006 küm sen million 1.65 jenjang sempet ngua liasü aser 2007 küm sen million 18 jenjang sempet tem ngua liasü.

BILEM DANGANG

"O nung tashi lir."